

四庫全書

子部

欽定四庫全書

子部

天中記卷二十九

詳校官中書臣李彤

主事臣祁韻士覆勘

總校官候補中允臣王燕緒

校對官編修臣王天祿

謄錄監生臣葉世倬

欽定四庫全書

天中記卷二十九

企美

明 陳耀文 撰

九京與歸趙文子與叔向游于九京曰死者若可作也  
吾誰與歸其隨武子乎納諫不忘其師言身不失其友  
事君不援而進不阿而退

晉語

執鞭方晏子伏莊公尸哭之成禮然後去豈所謂見義

不為無勇者邪至其諫說犯君之顏此所謂進思盡忠  
退思補過者哉假令晏子而在余雖為之執鞭所忻慕

馬史記

得見與游人或傳韓非書至秦秦王見孤憤五蠹之書  
曰嗟乎寡人得見此人與之游死不恨矣李斯曰此韓  
非之所著書也秦因急攻韓韓王始不用非及急廼遣  
非使秦秦王悅之未信用李斯姚賈害之上

新語陸賈為漢高帝著書十二篇每奏一篇高帝未嘗

不稱善左右呼萬歲稱其書曰新語

漢書

韓非之書傳於

奏庭始皇歎曰獨不得與此人同時陸賈新語每奏一

篇高祖左右稱曰萬歲夫嘆思其人與喜稱萬歲豈可  
空為哉誠見其美懼氣發於內也

論衡

前度文帝思賈誼徵之至入見宣室問鬼神之本至夜  
半文帝前席既罷曰吾久不見賈生自以為過之今不

及也

前漢

不得同時蜀人楊得意為狗監侍上上讀子虛賦而善

之曰朕獨不得與此人同時哉得意曰臣邑人司馬相

如自言為此賦上驚乃召問相如相如曰有是請為天

子游獵賦賦成奏之復奏大人頌天子大悅飄飄有凌

雲之氣似游天地之間意

史記

孝武善子虛之賦徵司馬

長卿孝成玩弄衆書之多善楊子雲出入遊獵子雲乘

從故曰玩楊子雲之篇樂於居千石之官挾桓君山之

書富於積猗頓之財

論衡  
佚文

棄印追謁趙谷字文楚舜帝時拜東海相之官道經蒙

陽令敦煌曹暉谷之故孝廉也迎路謁候谷不為留暉  
送至亭次望塵不及謂主簿曰趙君名重今過界不見  
必為天下笑即棄印綬追至東海謁谷畢辭歸家其為  
時人所貴若此

後漢

起舍候客張楷字公超通嚴氏春秋古文尚書門徒常  
百人賓客慕之自父黨宿儒偕造門焉車馬填街徒從  
無所止黃門貴戚之家皆起舍巷次以候過客往來之  
利楷疾其如此輒徙避之學者隨之所居成市後華陰

山南遂有公超市工

御李李膺字元禮性簡亢無所交接唯以同郡荀淑陳實為師友荀爽嘗就謁膺因為其御既還喜曰今日乃得御李君矣其見慕如此上膺恒以疾不送迎賓客二十日乃一通客唯陳仲弓來輒乘輦出門迎之膺家錄

居陽城時門生在門下者恒有四五百人膺每作一文出手門下共爭之不得墮地陳仲弓初令大兒元方來見膺與言語訖遣厨中食元方喜以為合意當復得見



馬商雲  
小說

異士郭太字林宗始至京師陳留人符融見而嘆曰高雅奇偉遠見清理行不苟合言不夸毗此異士也言之於河南尹李膺與相見曰吾見士多矣未有如郭林宗者也其聰識通朗高雅密博今之華夏鮮見其儔友而親之陳留人韓卓有知人之鑒融見原以己言告之卓曰此太原士也他日又以泰言告之卓曰四海內士也吾將見之於是驟見泰謂融曰此子神氣冲和言合規

矩高才妙識罕見其倫

後漢紀

同舟郭太游於洛陽始見河南尹李膺膺大奇之遂相友善於是名震京師後歸鄉里衣冠諸儒送至河上車數千兩林宗唯與李膺同舟而濟衆賓望之以為神仙

馬

後漢

顏子復生黃憲字叔度汝南慎陽人時論者咸云顏子復生而族出孤鄙父為牛醫潁川荀季和執憲手曰足下吾師範也後見袁奉高曰卿國有顏子寧知之乎奉

高曰卿見吾叔度耶

典畧

鄙吝復存黃叔度同郡陳蕃周舉常相謂曰時月之間不見黃生則鄙吝之萌復存乎心及蕃為三公臨朝嘆

曰叔度若在吾不敢先佩印綬矣

後漢

萬頃陂郭林宗少游汝南先過袁閎車不停執轡不輟  
輒詣黃叔度乃彌日信宿或

薛恭祖

問其故林宗曰奉高

之器譬諸汎濫雖清而易挹叔度汪汪若萬千頃之波

澄之不清擾清之不濁其器深廣難測量也

後漢世說

下坐為貴庾乘字世遊少給事縣庭為門士林宗見而  
拔之勸遊學宮遂為諸生傭後能講論自以卑第每處  
下坐諸生博士皆就讎問由是學中以下坐為貴

後漢

北海復知孔融為北海相黃巾復來侵暴融乃出屯都  
昌為賦管亥所圍融逼急乃遣東萊太史慈求救於平  
原相劉備備驚曰孔北海乃復知天下有劉備邪即遣  
兵三千救之賊乃散走

上

天際真人或以方謝仁祖不乃重者桓大司馬曰諸君

莫輕道仁祖企腳北窓下彈琵琶故自有天際真人想

說世

不似世人王長史為中書郎往敬和

洽

許爾時積雪長

史從門外下車步入尚書著公服敬和遙望嘆曰此不

復似世中人

上

貪與周旋王司州先為庾公記室叅軍後取殷浩為長

史始到庾公欲遣王使下都王自啟求往曰下官希見

盛德淵源始至猶貪與少日周旋

上

畫象銘壁宋纖字令父敦煌人少有遠操沈靜不與世  
交隱居酒泉南山不應辟命張祚時太守楊宣畫其象  
於閣上出入視之作頌曰為枕何石為漱何流身不可  
見名不可求太守馬岌造焉纖距而不見岌歎曰名可  
聞而身不可見德可仰而形不可覩先生人中之龍也  
銘詩於石壁曰丹巖百丈青壁萬尋奇木蒼鬱蔚若鄧  
林其人如玉維國之琛室邇人遐實勞我心晉書

千載盛美王弘之字方平家貧性好山水義熙中辟召

一無所就家在會稽上虞始寧沃川有佳山水弘之依  
巖築室謝靈運顏延之並相欽重靈運與廬陵王義真  
賤會境既豐山水是以江左嘉遁並多居之至若弘之  
拂衣歸耕踰歷三紀孔淳之隱約窮岫自始迄今阮萬  
齡辭事就閑簪戎先業既遠同羲唐亦激貪厲競若遣  
一箇有以相存真可謂千載盛美也

南史

陵霄駕鳳袁顓圖避禍於襄陽當時皆美之謂為陵霄

駕鳳遂與義嘉同戚

明帝答王  
景文詔

子無所恨王訓字懷範小字文殊年十六召見文德殿  
應對爽徹上目送之久謂朱昇曰可謂相門有相初補  
國子生問說師袁昂昂曰久籍高名有勞虛想及觀容  
止若披雲霧俄而諸袁子弟來昂謂諸助教曰我兒出  
十數若有一子如此實無所恨

南史

蘭臺聚到漑字茂灌少孤貧與兄沼弟洽俱知名起樂  
安任昉大相賞好提携漑洽二人廣為聲價梁天監初  
昉出守義興要漑洽之郡為山澤之遊昉還為御史中



承後進皆宗之時有彭城劉孝綽劉苞劉孺吳郡陸倕  
張率陳郡殷芸沛國劉顯及溉洽專輔日至號曰蘭臺  
聚陸倕贈昉詩云和風雜美氣下有三人遊壯矣荀文  
若賢哉陳大邱今則蘭臺聚萬古信為傳任君本遠識  
張子復清修既有絕塵到復見黃中劉時謂昉為任君  
比漢之三君到則溉兄弟也上

望塵阮孝緒字士宗屏居一室未嘗出戶親友呼為居  
士天監初御史中丞任昉尋其兄履之欲造而不敢望

而嘆曰其室雖適其人甚遠其為名流所欽尚如此自是欽慕風譽者莫不懷刺欽衽望塵而息上

校試誤錯韓顯宗字茂親性剛直有才學沙門法撫三齊稱其聰悟常與顯宗校試抄百餘人名各讀一遍隨即覆呼法撫猶有一二舛謬顯宗了無誤錯法撫歎曰貧道生平以來唯服卽耳

魏書

神人李諧字虔和幼有風采趙郡李搔嘗過元叉門下見之歸謂其父元忠曰領軍門下見一神人元忠曰必

李諧也問之果然諧與盧元明聘梁梁武使朱異覲客  
異言諧元明之美諧等見及出梁武目送之謂左右曰  
朕今日遇勅敵卿輩常言此間都無人物此等何處來  
謂異曰過卿所談

北史

誦騷佳器盧元明字幼章風采閑潤善自標置不妄交  
遊飲酒賦詩遇興忘返性好玄理少時常從鄉還道途  
遇相州刺史中山王熙熙博識之士見而歎曰盧郎有  
如此風神唯須誦離騷飲美酒自為佳器遂留之數日

贈帛及馬而別上

傾服陽休之字子烈早得才名為人物所領服外如踈  
放內實謹厚少年頗以峻急為累晚節以通美見稱重  
衿期好游賞太常卿盧元明人地華重罕所交接非一  
時名士不得與之游休之始為行臺郎便坦然投分文  
酒會同相得甚款鄉曲人士莫不企羨焉上

津梁封軌字廣度深為郭柞所知柞常謂子景尚曰封  
軌高綽二人並幹國之才必應遠至吾平生不妄進舉

而每薦此二人非直為國進賢亦為汝等之津梁其見重如此軌既以方直自業高綽亦以風槩立名高肇拜司徒綽送迎往來軌竟不詣綽顧不見軌乃遽歸曰吾一生自謂無愆規矩今日舉措不如封生遠矣上

懷古盧玄字子真太武辟召天下儒雋以玄為首崔浩每與言輒嘆曰對子真使我懷古之情更深上

羞對軒冕袁叔德候李僧伽先減僕從然後入門曰見此賢令吾羞對軒冕

心醉忘疲元或字文若少有才學時譽甚美侍中崔光見或退而謂人曰黑頭三公當此人也少與從兄安

開

明中山王熙並以宗室博古文學齊名時人莫能定其優劣尚書郎范陽盧道將謂吏部清河崔休曰三人才學雖無優劣然安豐少於造次中山皂白太多未若濟南風流寬雅時人為之語曰三王楚琳瑯未若濟南備員方或姿制閑裕吐發流靡瑯琊王誦有名人也見之未嘗不心醉忘疲或本名亮字仕明時侍中穆紹

與或同署避紹父諱啟求改名詔曰仕明風神運吐常

自以此荀文若可名或以取定體相倫之美

魏書

杯屬元凱袁尚書翻朕之杜預欲以此杯敬屬元凱今

為盡之侍坐者莫不美仰

北史

曹陸復生溫子昇字鵬舉博覽百家文章清婉梁使張  
舉寫其文筆傳於江外梁武稱之曰曹植陸機復生于

北土恨我詞人數窮百六

魏書

嚴鄭陸慶少好學節操甚高仕梁為婁令陳永陽王為

吳郡太守聞其名欲與相見慶辭以疾時宗人陸榮為郡五官掾慶嘗詣焉王乃微服往榮宅穿壁以觀之王謂榮曰觀陸慶風神凝峻殆不可測嚴君平鄭子真何

以尚茲

南史

為異代交蕭允字升佐為會稽郡丞行經延陵季子廟設蘋藻之薦託為異代之交為詩以叙意辭理清典後主嘗問蔡徵曰卿世與蕭允相知此公志操何如徵曰其清虛玄遠殆不可測至於文章可得而言因誦允詩



以對後主嗟賞久之

陳壽

留宿十日閭立本家代善盡至荊州張僧繇舊迹曰定  
虛得名耳明日更往曰名下定無虛士坐卧觀之留宿

其下十日不能去

隋唐  
嘉話

宿傍三日率更令歐陽詢行見古碑索靖所書駐馬觀  
之良久而去數百步復還下馬佇立疲則布毯坐觀因  
宿其傍三日而後去

上

望之若仙高宗承貞觀之後天下無事上官儀獨持國

政嘗凌晨入朝巡洛水隄步月徐轡詠詩曰脈脈廣川  
流驅馬歷長洲鵲飛山月曙蟬噪野風秋音韻清亮羣

公望之若神仙

國史  
異纂

年不可及崔湜弱冠進士登科不十年掌貢舉後三登  
宰輔年始三十六崔之初執政也方二十七容止端雅  
文詞清麗嘗暮出端門下天津橋馬上自吟春遊上林  
苑花滿洛陽城張說嘗為工部侍郎望之杳然而嘆曰  
此句可效此位可得其年不可及也

翰林  
盛事

登仙開元中朝廷選用羣官必推精當文物既盛英賢  
出入皆薄具外任雖雄藩大府由中朝冗員而授時以  
為左遷班景倩自揚州採訪使入為大理少卿路由大  
梁倪若水為郡守西郊盛設祖席宴罷景倩登舟若水  
望其行塵謂掾吏曰班公是行何異登仙乎為之騶殿  
良所甘心然良久方整回駕既而為詩投相府以道  
其誠其詞為當時所稱賞

明皇  
雜錄

晉目有異李邕自刺史入計京師邕素負才名頻被貶

斥皆以邕能文養士賈生信陵之流執事忌勝剥落在  
外人間素有聲稱後進不識京洛阡陌聚看以為古人  
或將眉目有異衣冠望風尋訪門巷又中使臨問索其

新文

譚賓  
錄

謫仙李太白初自蜀至京師舍於逆旅賀監知章聞其  
名首訪之既奇其姿又請所為文白出蜀道難以示之  
讀未竟稱歎數四號為謫仙人白自幼好酒於兗州習  
業平居多飲又於任城縣構酒樓日與同志荒宴其上

少有醒時邑人皆以白重名望其重而加敬焉

本事詩

識荆李白與韓荆州書聞天下談士相聚而言曰生不用萬戶侯但願一識韓荆州何今人之景慕一至於此耶豈不以周公之風躬吐握之事使海內豪俊奔走而歸之一登龍門則聲譽十倍所以龍盤鳳逸之士皆欲收名定價於君侯

名利心盡房琯每見元德秀歎息曰見紫芝眉宇使人名利之心都盡蘇源明常語人曰吾不幸生衰俗所不

耻者識元紫芝也

唐書

景星鳳鳥李渤字濬之與兄涉偕隱廬山更涉少室元和初以右拾遺召不拜洛陽令韓愈遺書曰有詔河南敦諭拾遺公朝廷士引領東望若景星鳳鳥始見爭先覩之為快想冠帶就車惠然肯來利加于時名垂將來踴躍懷企頃刻以冀上

泰山北斗昔孟軻拒楊墨去孔子才二百年愈排二家乃去千餘歲撥衰反正功與齊而力倍之所以過況雄

為不少矣自愈沒其言大行學者仰之如泰山北斗云

上

思其風烈裴度退然纔中人而神觀邁爽操守堅正善  
占對既有功名震四夷使外國者其君長必問度年今  
幾狀貌孰似天下用否其威譽德業比郭汾陽而用不  
用常為天下重輕事四朝以全德始終及歿天下莫不  
思其風烈

上

佳壻獨孤郁權相之子壻也歷掌內外綸誥有美名憲

宗歎曰我女壻不如德興女壻

國史補

五年召充翰林學

士郁以婦公辭內職憲宗曰德興乃有此佳壻

舊唐

城下水陸鴻漸名羽少事竟陵禪師師去世作寄情歌

云不羨黃金壘不羨白玉杯不羨朝入省不羨暮入臺

千羨萬羨西江水曾向竟陵城下來

國史補  
傳載

劉九經宣州當塗隱居山巖有僧名彥範俗姓劉雖為

沙門而通儒學邑人呼為劉九經執經受業者數十人

年八十猶強健能飲穆兵部贊事之最謹有得其遺彥



範書云某偶忝名宦皆因善誘自居班列終日塵屑却  
思昔歲臨清澗蔭長松接侍座下獲聞微言未知何時  
復遂此事遙瞻水中月嶺上雲但馳攀想而已和尚薄  
於滋味深於酒德所食僅同嬰兒所飲或如少壯常恐  
尊體有所不安中夜思之實懷憂戀其誠切如此日月  
之下稱門人姓名狀和尚前

林語

爵祿盡受上元瓦官寺僧守亮通周易李衛公鎮浙西  
以南朝舊寺多名僧求知易者帖下諸寺令擇送至府

欽定四庫全書

天中記  
卷二十九

十六

守亮請行既至公初見未之敬及與言論分條析理出沒幽曠公凡欲質疑亮已演其意公不覺前席命甘露寺設館舍自於府中陳講席命從事以下皆橫經聽之逾年方畢既而請再講講將半亟請歸甘露既至命浴浴畢整巾縷白公云大限今至不及回辭言訖而終公聞驚異明日率賓客致祭適有南海使送西國異香公於龕前焚之其煙如弦穿屋而上觀者悲敬公自草祭文謂舉世官爵俸祿皆加於亮亮盡受之可以無愧

語林

勤三事李襲譽好寫書謂子孫曰吾近京城有賜田十頃耕之可以充食河內有賜桑千株蠶之可以充衣江東所寫之書讀之可以求官吾沒之後爾曹但勤此三

事何美於人

讀世說

畫像書室承暉貞祐初拜尚書右丞妻子留滄州滄州破妻子皆死宣宗遷汴與皇太子留守中都元兵至中都都不守仰藥死暉生而貴富居家類寒素常置司馬光

蘇軾像於書室曰吾師司馬而友蘇公

金史

任誕

荒畊子產相鄭有兄曰公孫朝有弟曰公孫穆朝好酒  
穆好色朝之室也聚酒千鍾積麴成封望門百步糟漿  
之氣逆於人鼻方其荒於酒也不知世道之安危人事  
之悔吝室內之有無九族之親疎存亡之哀樂也雖水  
火兵刃交於前弗知也穆之後庭比房數十皆擇稚齒  
嫵媚者以盈之方其畊於色也屏親昵絕交游逃于後  
庭以晝足夜三月一出意猶未愜鄉有處子之娥姣者

必賄而招之媒而挑之弗獲而後已子產以為戚造鄧  
析謀之析曰子奚不喻以性命之重誘以禮義之尊乎  
子產用析之言因間以謁而告之朝穆曰凡生之難遇  
而死之易及以難遇之生俟易及之死可孰念哉且若  
以治國之能夸物失善治外者物未必治而身交苦善  
治內者物未必禮而好交逸若欲以彼術而教我哉子

產忙然無以應之

列楊  
朱

何貪頹史莊周病劇弟子對之泣應曰我今死則誰先

更百年生則誰後必不得免何貪於須臾

桓譚新論

天下無偶戴良字叔鸞少誕節母意驢鳴良常學之以  
娛樂焉及母卒兄伯鸞居廬啜粥非禮不行良獨食肉  
飲酒哀至乃哭而二人俱有毀容或問良曰子之居喪  
禮乎良曰然禮所以制情佚也情苟不佚何禮之論夫  
食旨不甘故致毀容之實若味不存口食之可也論者  
不能奪之良才既高遠而論議尚奇多駭流俗同郡人  
季孝問曰子自視天下孰可為比良曰我若仲尼長東

魯大禹出西羌獨步天下誰與為偶

後漢

化土為壺鄭泉字文淵陳邑人博學有奇志而性嗜酒其閑居每曰願得美酒滿五百斛船以四時甘脆置兩頭反覆沒飲之懣即住而啖餚膳酒有斗升減隨即益之不亦快乎臨卒謂同類曰必葬我陶家之側庶百歲之後化而成土幸見取為酒壺實獲我心矣

吳書

醉眠婦側阮公隣家婦有美色當壚酤酒阮與王安豐常從婦飲酒阮醉便眠其婦側夫始殊疑之伺察終無

他意

世說

哭鄰女阮籍鄰家處子有才色未嫁而卒籍與無親生不相識往哭盡哀而去其達而無檢皆此類也

王隱晉書

求步兵步兵校尉缺厨中有貯酒數百斛阮籍乃求為

步兵校尉

世說

母終飲酒阮籍性至孝母將死正與人圍碁對者求止籍與決賭既而飲酒二十舉聲一號吐血數升及將葬食一蒸豚飲二斗酒然後臨訣直言窮矣舉聲一號因



又吐血數升毀瘠骨立殆致滅性裴楷往弔之籍散髮箕踞醉而直視楷弔訖畢便去晉籍遭母喪在晉文王坐進酒肉司隸何曾亦在坐曰明公方以孝治天下而阮籍以重喪顯於公坐飲酒食肉宜流之海外以正風教文王曰嗣宗毀頓如此君不能共憂之何謂且有疾而飲酒食肉固喪禮也籍飲啖不輟神色自若世說魏晉之間有被髮夷傲之事皆死忘生之人反謂行禮者籍

為之也

于寶  
晉紀

通達魏末阮籍嗜酒荒放露頭散髮裸袒箕踞其後貴  
游子弟阮瞻王澄謝鯤胡毋輔之之徒皆祖述於籍謂  
得大道之本故去巾幘脫衣服露醜惡同禽獸甚者名  
之為通次者名之為達也

王隱  
晉書

窮途輒哭阮籍時率意獨駕不由徑路車迹所窮輒慟  
哭而反嘗登廣武觀楚漢戰處歎曰時無英雄使豎子

成名

晉書

遺形骸劉伶字伯倫放情肆志常以細字宙齊萬物為

心與阮籍嵇康相遇欣然神解攜手入林初不以家產有無介意常乘鹿車攜一壺酒使人荷鋤而隨之謂曰死便埋我其遺形骸如此上

裸形劉伶恒縱酒放達或脫衣裸形在屋中客有詣者見而譏之伶笑曰吾以天地為宅舍以屋宇為幃衣諸

君自不當入我幃中又

闕

其自任若是

鄧粲  
晉紀

作達阮渾字長成風氣

闕

似父亦欲作達步兵曰仲

容已預之卿不得復爾

世說

園酌諸阮皆能飲酒仲容至宗人閒共集不復用常枵  
一酌以大甕盛酒園坐相向大酌時有羣猪來飲直接  
去土便共飲之上

名教樂地王平子

澄

胡母輔之

國

諸人皆以任放為達

或有裸體者樂廣笑曰名教中自有樂地何為乃爾上  
字父胡母謙之字子光才學不及父而傲縱過之至酣  
醉常呼其父字輔之亦不以介意談者以為狂輔之正  
酣飲謙之闕而厲聲曰彥國年老不得為爾將令我屍

背東壁輔之歡笑呼入與共飲其所為如此

晉書

貽戚胡母彥國至湘州爾時三伏中彥國坐正衙搖扇視事其子子光從容顧語曰彥國復何為自貽伊戚

八達先逸字孟祖以世難避亂渡江依胡母輔之初至屬輔之與謝鯤阮放畢車羊曼桓彝阮孚散髮裸袒閉室酣飲已累日逸將排戶入守者不聽逸便於戶外脫衣露頭於狗竇中窺之而大叫輔之驚曰他人決不能爾必我孟祖也遽呼入遂與飲不捨晝夜時人謂之八

達晉書

江東步兵張季鷹翰縱任不拘時人號為江東步兵或

謂之曰卿乃可縱適一時獨不為身後名邪答曰使我

有身後名不如即時一醉酒

世說

不識寄載賀司空入洛赴命為太孫舍人經吳閶門在  
船中彈琴張季鷹本不相識先在金閶亭聞弦甚清下  
船就賀因共語便大相知說問賀卿欲何之賀曰入洛  
赴命正爾進路張曰吾亦有事北京因路寄載便與賀

同發初不告家家追問廼知上

金貂換酒阮孚字遙集渡江為安東參軍被髮飲酒不以王務嬰心時元帝既用申韓以救世而率之徒未能無也雖然不以事任處之孚端拱嘯詠以樂當年嘗以金貂換酒為所司彈劾帝宥之上

露醜王導與周顗及朝士詣尚書紀瞻觀伎瞻有愛妾能為新聲覬於衆中欲通其妾露其醜穢顏無怍色有

奏免顗官詔特原之

鄧燦  
晉紀

方外司馬謝奕字無奕與桓溫善溫辟為安西司馬猶  
推布衣好在溫坐岸憤笑詠無異常日桓溫曰我方外  
司馬奕每因酒無復朝廷禮常逼溫飲溫走入南康主  
門避之主曰君若無狂司馬我何由得相見奕遂攜酒  
就聽事引溫一兵帥共飲曰失亦老兵得亦老兵亦何  
所在溫不之責

晉書

游肆劉尹云孫承公狂士少誕任不羈家於會稽性好  
山水及求鄞縣遺心細務縱意游肆名阜勝川靡不歷



覽每至一處賞翫累日或回至半路却返

中興書

白羊肉美羅友作荊州從事桓溫為王洽集別友進坐  
良久辭出溫曰卿向欲答事何以便去答曰友聞白羊  
肉美一生未曾得喫故冒求前耳無事可答今已飽不

復須駐了無慚色

世說

乘醉吊王忱字元達性任達不拘末年尤嗜酒一飲連  
月不醒或裸體而游每嘆三日不飲便覺形神不相親  
婦父常有慘怛乘醉吊之婦父慟哭忱與賓客十許人

欽定四庫全書

天中記  
卷二十九

連臂被髮裸身而入繞之三匝而出其所行多此類

晉書

自娛謝安愛好聲律暮功之慘不廢妓樂衣冠效之遂以成俗王坦之非而苦諫之安遺坦之書曰知君思相愛惜之至僕所求者聲謂稱情義無所不可為聊復以自娛耳若絜軌跡崇世教非所擬議亦非所屑常謂君粗得鄙趣者猶未悟之濠上邪故知莫逆未易為人坦之答曰具君雅旨此是誠心而行獨往之美然恐非大雅中庸之謂吾子少立德行體議淹允加以令地優游

自居僉曰之談咸以清遠相許至於此事實有疑焉公  
私二三莫見其可以此為濠上悟之者得無鮮乎且天  
下之寶故為天下所惜天下之非何為不可以天下為  
心乎想君幸復三思書往反數四安竟不從

坦之傳

安又

於土山營墅樓館林竹甚盛每攜中外子姪往來游集  
肴饌亦屢費百金世頗以此譏焉而安殊不以屑意

安傳

稱名士王孝伯

恭

言名士不必須奇才但使常得無事

痛飲酒熟讀離騷便可稱名士

世說

為情死王長史

庾

登茅山大慟哭曰琅邪王伯與終當

為情死

上

酒肆挽歌文帝嘗召顏延之傳詔頻日尋覓不值文帝

曰但酒店中求之自當得也傳詔依旨訪覓果見延之

在酒肆裸身自挽歌了不應對他日醉醒乃往

謝靈運拾遺錄

游行經旬謝靈運以文帝不甚任遇意不平多稱疾不

朝直穿池植援種竹樹重驅課公役無復期度出郭游

行戒一百六七十里經旬不歸既無表聞又不請急賜

假東歸與族弟惠連何長瑜荀雍羊璠之以文章賞會  
共為山澤之游時人謂之四友靈運因祖父之資生業  
甚厚奴僮既衆門生數百鑿山浚湖功役無已尋山涉  
嶺必造險峻巖嶂數十重莫不備盡登躡常著木屐上  
山則去其前齒下山去其後齒嘗自始寧南山伐木開  
徑直至臨海從者數百臨海太守驚駭謂為山賊知是  
靈運乃安

宋書

好獵王僧達為宣城太守性好游獵而山郡無事僧達

肆意馳騁或五日三日方歸受辭辯訟多在獵所人或

逢不識問府君所在僧達且曰在此

南史

循寄滄洲袁祭領丹陽尹愛好虛遠雖位任隆重不以  
事務經懷獨步園林詩酒自適家居負郭每杖策逍遙  
當其意得悠然忘返嘗步歷白楊郊野間遭遇一士大  
夫便呼與酣飲明日此人謂被知顧到門求進祭曰昨  
飲酒無偶聊相要耳竟不與相見嘗作五言詩訪迹雖  
中字循寄乃滄洲蓋其志也

上

游俠處士何點字子皙容貌方雅真素通美不以門戶  
自矜雖不入城府性率到好狎人物遨遊人間不簪不  
帶以人地並高無所與屈大言蹠踞公卿敬下或乘馬  
專躡草屨恣心所適致醉而歸故世論以點為孝隱士  
弟肩為小隱士大夫多慕從之時人稱重其通號曰游  
俠處士

事外關

王裕之字敬弘為臨川王道規諮議叅軍時

府主簿宋協亦有高趨道規並以事外相期嘗共酣飲

敬弘因醉失禮為外司所白道規即便引還重申初讌  
左右嘗使二老婦女戴五條辨著青紋袴襪飾以朱粉  
女適尚書僕射何尚之弟述之敬弘嘗往何氏看女遇  
尚之不在因寄齋中卧俄頃尚之還敬弘還使二婦女  
守閤不聽尚之入云正熱不堪相見君可且去尚之於  
是移於他室

閉車新婦曹景宗字子震頗愛史書每讀穰苴樂毅傳  
輒放卷歎息曰丈夫當如是為人自是尚勝每作書字



有不解不以問人皆以意造焉出行常欲褰車帷慢左  
右輒陳以位望隆重人所具瞻不宜然景宗謂所親曰  
我昔鄉里騎快馬如龍與年少輩數十騎拓弓弦作霹  
靂聲箭如鉞鳴斗平澤中逐麋數肋射之渴飲其血饑  
食其肉甜如甘露凝覺耳後風生鼻頭出火此樂使人  
忘死不知老之將至今來揚州作貴人動轉不得路行  
開車慢小人輒言不可閉置車中如三日新婦遭此邑  
邑使人無氣為人嗜酒好樂臘月於宅中使作野雉逐

日乃往人家乞酒食

梁書

三駒對飲謝幾卿會意便行不拘朝憲嘗預樂遊花晏  
不得醉而還因詣道邊酒壚停車褰幔與車前三駒對  
飲時觀者如堵幾卿處之自若後以在省署夜著犢鼻  
褌與門主登閣道飲酒酣呼為有司糾奏坐免官居宅  
在白楊石井朝中交好者載酒從之賓客滿坐時左丞  
庾仲容亦免歸二人意志相得並肆情誕縱或乘露卓  
歷遊郊野既醉則執鐸挽歌不屑物議

上

肆意酣歌衡山縣侯蕭恭性尚華侈而尤好賓友酣晏  
終辰坐客滿筵言談不倦時元帝居蕃頗事聲譽勤心  
著述卮酒未嘗妄進恭每從容謂曰下官歷觀時人多  
有不好懼興乃仰眠床上看屋梁而著書千秋萬歲誰  
傳此者勞神苦思竟不成名豈如臨清風對朗月登山  
泛水肆意酣歌也

南史

蓬室草筵胡叟字倫許自涼歸魏賜爵始復男家於密  
雲蓬室草筵惟以酒自適謂友人金城宗舒曰我此生

活似勝焦先志意所栖謝其高矣尋歸家不治產業常  
苦飢貧然不以為耻養子字螟蛉以自給養每至貴勝  
之門恒乘一牒牛敝韋袴褶而已作布囊容三四斗飲  
噉醉飽便盛餘肉餅以付螟蛉見車馬榮華者視之蔑  
如也

魏書

放達常醉李元忠雖處要任初不以物務于懷唯以聲  
酒自娛大率常醉家事大小了不關心園庭羅種果藥  
親朋尋詣必留連宴賞每挾彈攜壺遊教里閭每言寧

無食不可使我無酒阮步兵吾師也孔少府豈欺我哉  
神武欲用為僕射文襄言其放達常醉不可委以臺閣  
其子搔聞之請節酒元忠曰我言作僕射不勝飲酒樂  
爾受僕射時宜勿飲酒

北齊

不披故紙韓晉明軌子也有狹氣諸勲貴子孫中最留  
心學問好酒誕縱招引賓客一席之費動至萬錢猶恨  
儉率朝廷處之貴要之地必以疾辭告人云廢人飲美  
酒對名勝安能作刀筆吏返披故紙乎

北齊  
傳九

車輪括頸高季式字子通豪率好酒又恃舉家勲功不  
拘檢節與光州刺史李元忠生平遊款在濟州夜飲憶  
元忠開城門令左右乘驛馬持一壺酒往光州飲之朝  
廷知而容之黃門郎司馬消難左僕射子如之子又是  
神武壻勢盛當時因退食暇尋季式酣歌留宿旦日重  
並闕消難固請去季式曰君以地勢脅我邪消難拜謝  
請出終不見許酒至不肯飲季式索車輪括消難頸又  
更索一車輪自括頸引滿相勸消難不得已笑而從之

方俱脫車輪更留一宿及消難出方具言之

北史  
元傳

引客為歡李孝基字元操仕齊為給事中隋初以字行  
為蒙州刺史不復留意於文筆人問其故慨然嘆曰五  
十之年倏然而過鬢垂素髮筋力已衰宦情文意一時  
盡矣悲夫每暇日輒引賓客絃歌對酒終日為歡

北史

不須名位劉含度性虛遠有氣調風流跌宕名高一時  
嘗云不須名位所須衣食不用身後之譽惟重目前所  
覓

行樂後期韓朝宗會為山南采訪使謂孟浩然深閑詩律真諸周行必詠穆如之頌因入奏挾與偕行先揚於朝約日引謁及期浩然會友生文酒講好甚適或曰子與韓公諾而怠之無乃不可乎浩然曰僕已飲矣身行樂耳遑恤其他遂畢席不赴

王士源浩然集序

四明狂客賀知章晚年尤加縱誕無復規檢自號四明狂客又稱秘書外監遨遊里巷醉後屬詞動成卷軸文不加點咸有可觀又善草隸書好事者供有牋翰每紙



不過數十字共傳寶之

唐舊

浪迹江湖李白待詔翰林日與飲徒醉於酒肆玄宗有  
感欲造樂府新詞亟召白白已卧於肆中矣召入以水  
洒面即令秉筆頃之成十余首帝頗嘉之嘗沉醉令高  
力士脫靴由是斥去乃浪迹江湖終日沉飲侍御史崔  
宗之謫官金陵與白詩酒相歡嘗月夜乘舟採石達金  
陵白衣宮錦袍於舟中顧瞻笑傲旁若無人

續世說

白酷

好酒知章因解金龜換酒與傾盡醉期不間日

釣鼇客李白開元中謁宰相封一版上題曰海上釣鼇客李白宰相問曰先生臨滄海釣巨鼇以何為釣線曰以風浪逸其情乾坤縱其志虹蜺為絲明月為鈎又曰何物為餌曰以天下無義氣丈夫為餌時相踈然撫張遺

祐嘗謁李紳自稱釣巨鼇客李盛怒因詰之曰以何為

竿曰以虹為竿問以何為鈎曰以月為鈎又問以何為

餌曰以短李相為餌紳默然厚贈之

疑即一事

跨馬入士杜佑字君卿在維揚日嘗語賓幕曰我致政

後著一麗布襴衫跨小馬入市看盤伶傀儡足矣後致政果如其言諫官䟽言三公不合入市公曰此自無意正欲爾

酒器填懷裴鈞僕射鎮襄州大宴巡官裴弘泰後至鈞不悅弘泰曰請在座銀器盡酌酒滿之隨飲以賜弘泰可乎鈞許之遂揭座上小爵至觥船凡飲皆竭隨即填于懷有銀海受一斗以上以手捧而飲盡踏其海捲抱之索馬而去鈞使人視弘泰方箕踞而坐秤所得銀器

二百餘兩不覺大笑

乾  
子 膜

敗案後唐馬郁事武莊莊宗禮遇甚厚累官至秘書監  
監軍張承業權貴任事與賓僚宴集出珎菓陳列於前  
客無敢先嘗者當郁前者食之必盡承業私戒主者曰  
他日馬監至唯以乾藕子置前而已郁知不可啖異日  
韉中出一鐵搗碎而食之承業大笑曰為公易之勿敗

吾案其俊率如此

續世  
說

唱晚歌入何承裕韶州曲江人有逸才為小詞尤工與

陶穀素不叶周世宗欲以為知制誥穀奏沮之遂已何  
知之及陶之判銓一旦方偃息何自外抗聲唱挽歌而  
入陶甚驚駭承裕曰尚書宜長生不死者耶幸甚無恙  
聞其一兩曲又何妨陶無以抗及知商州有舉人投卷  
初甚欣慰及覽其詩有日暮猿啼旅思悽之句遽曰足  
下此句甚佳但上句對屬未切奉為改之何不云曉來  
犬吠張三婦日暮猿啼旅思悽舉人大慙而去  
五代史補  
跨牛趨府何承裕晉天福末舉進士有清才而嗜酒狂

逸為藍屋咸陽二縣令醉則露首跨牛趨府府尹王彥  
升以其名士而容之然為治清而不煩民頗安焉每覽  
牒訴必戲判以喻曲直訴者多心伏引去往往召豪吏  
接坐引滿吏因醉挾私白事承裕悟之笑曰此見罔也  
當受杖杖訖復召與飲其無檢多類此

宋文苑趙  
麟幾傳

三絕馮吉字惟一道子也性滑稽無操行周顯德中為  
太常少卿頗不得意以杯酒自娛每朝士宴集雖不召  
亦常自至酒酣即彈琵琶彈罷賦詩詩成起舞時人愛

其俊逸謂之三絕<sup>上</sup>

風月主人歐陽彬孟景以為嘉州刺史喜曰青山綠水中為二千石作詩飲酒為風月主人豈不嘉哉

蜀檇

獨存何樂范純仁云或相勉以攝生之理不知人非久在世間物假如丁令威千歲化鶴歸鄉見城郭人民皆非則獨存亦何足樂

輕詆

蚩書劉表嘗自作書欲與孫伯符以示禰衡衡蚩之言

如是為欲使孫策帳下兒讀之邪將使張子布見乎

與

表嘗作上事極以為快衡見之便滅投地曰作此筆者

為食飯不

別傳

欲作老吏管寧少便恬靜常笑邴原華歆有仕宦意及  
華為司徒上書讓寧寧聞之笑曰子魚本欲作老吏故  
榮之耳

妄語王太尉問眉子玄汝叔澄名士何以不相推重眉

子曰何有名士終日妄語

世說



何處活阮裕聞何充為宰相嘆曰我當何處生活

語林

人中市井袁貞為監軍時范玄平汙為吏部尚書大坐語袁卿此還不失為護軍袁曰卿何事人中作市井

聚溷謝幼輿謂周顗曰卿類社樹遠望之峨峨拂青天就而視之其根則羣狐所託下聚溷而已答曰枝條拂青天不以為高羣狐亂其下不以為濁聚溷之穢卿之

所保何足自稱

世說

論議更克王右軍與王敬仁許玄度並善二人亡後右

軍為論議更克孔巖誠之曰明府昔與王許周旋有情  
及遊沒之後無慎終之好民所不取右軍甚愧

非吏非隱孫興公綽少與許詢俱有高尚之志嘗鄙山  
濤而謂人曰山濤吾所不解吏非吏隱非隱若以元禮

比之龍津則當點額暴鱗矣

晉書

怪鳥孫盛字安國與桓溫俱伐蜀還與溫牋而辭旨放  
蕩稱川遣從事觀採風聲進無威鳳來儀之美退無鷹  
鷂搏擊之用徘徊湘川將為怪鳥

上

符朗初過江吏部郎王忱與兄國寶命駕請之沙門法汰問朗曰見王吏部兄弟未朗曰非一狗面人心又一人面狗心者是邪忱醜而才國寶美而狠故也

秦書

虎狔虎犢王右軍在南丞相與書每歎子姪不令云虎狔虎犢還其所如

作面向人褚太傅南下孫長樂於船中視之言次及劉真長死孫流涕因諷詠曰人之云亡邦國殄瘁褚大怒曰真長平生何嘗相比而卿今日作此面向人

標同伐謝鎮西書與殷揚州為真長求會稽殷答曰真長標同伐異俠之大者常謂使君降階為甚乃復為之驅馳邪

比肩何辱袁虎伏滔同在桓公府桓公每遊燕輒命袁伏袁甚耻之恒歎曰公之厚意未足以榮國士與伏滔比肩亦何辱如之

何物真豬孫綽作列仙商邱子贊曰所物何物殆非真豬儻遇風雲為我龍攄時人多以為能王藍田語人云

近見孫家兒作文道何物真豬也

宿言歟雜孫長樂兄弟就謝公宿言至歟雜劉夫人在  
壁後聽之具聞其語謝公明日還問昨客何似劉對曰  
亡兄門未有如此賓客謝深有愧色

世說

塵垢囊王中郎與林公絕不相得王謂林公詭辨林公  
道王云箸膩顏恰綸布單衣挾左傳逐鄭康成車後問  
是何物塵垢囊

上

束教王北中郎不為林公所知乃箸論沙門不得為高

士論大畧云高士必在於縱心調暢沙門雖云俗外反更束於教非情性自得之謂也

失鷹師王興道謂謝望蔡霍霍如失鷹師

上和之也

狗放無處王僧達性好鷹犬何尚之致仕復膺朝命於宅設八關齋大集朝士自行香次至僧達曰願郎且放鷹犬勿復游獵僧達答曰家養一老狗放無處去已復

還尚之失色

南史

去復還何尚之在家常著鹿皮帽及拜開府天子臨軒

百僚倍位沈慶之於殿庭戲之曰今日何不著鹿皮冠  
慶之累辭爵命朝廷敦勸甚苦尚之謂曰主上虛懷側  
席詎宜固辭慶之曰沈公不效何公去而復還也尚之  
有愧色

上

終後無繼孟顗嘗就徐羨之因叙闕洛中事顗歎劉穆  
之終後更無繼者王弘亦在甚不平曰昔魏朝酷重張  
邵謂不可一日無之及邵死何闕興廢顗不悅衆竇笑  
而釋之

南史

呼公顏延之嘗與何偃同從上南郊於路中遙呼延之  
曰顏公延之以其輕脫恠之答曰身非三公之公又非  
田舍之公又非君家阿公何以見呼為公偃羞而退南史  
歌謠顏延之每薄湯惠休詩謂人曰休上人制作委巷  
間歌謠耳

劇言苦句何長瑜為臨川王義慶參軍嘗于江陵寄書  
與宗人何勗以韻語序義慶州府僚佐陸展等而輕薄  
少年遂演而廣之凡厥人士並為題目皆加劇言苦句



其文流行又慶大怒除為增城令

宋書謝靈運傳

賣袁劉司徒褚彥回送湘州刺史王僧虔閣道壞墜水  
僕射王儉嘗驚蹠下車謝超宗拊掌笑戲曰落水三公  
墜車僕射彥回出水濡濕狼籍超宗先在僧虔航抗聲  
曰有天道焉天所不容地所不受投畀河伯河伯不受  
彥回大怒曰寒士不遜超宗曰不能賣袁劉得富貴焉

免寒士前後言諂稍布朝野

南史

羞面見人劉祥字顯徵少好文學性韻剛疎輕言肆行

不避高下司徒褚淵人朝以腰扇鄣日祥從側過曰作  
如此舉止羞面見人扇鄣何益淵曰寒士不遜祥曰不  
能殺袁劉安得免寒士永明中作連珠有以啟上者令  
任遐奏祥飲酒無度言語闌逸非可稱紙墨上敕曰卿  
位涉清塗於分非屈何意輕肆口臧詆目朝士造席立  
言必以貶裁為口實諠議朝廷不避尊賤肆口極辭彰  
暴物聽近見卿影連珠寄意悖慢彌不可長

齊書

佞人周旋大明時皇太子冠上臨宴東宮與顏師伯柳

元景沈慶之等並擣捕恣孫勸師伯酒師伯不飲恣孫  
因相裁辱曰不能與佞人周旋師伯見寵於上上常嫌  
恣孫以寒素陵之因此發怒曰袁濯兒不逢朕員外郎  
未可得也而敢寒士遇物將手刃之命引下席恣孫色  
不變沈柳並起謝久之得釋

南史

沈黃閭張暢以陷南譙王義宣見原孝武宴朝陽暢亦  
在坐何偃因醉曰張暢故是奇才同義宣作賊亦能無  
咎非才何以致此暢乃厲聲曰太初之時誰黃其閭帝

曰何事相苦初元凶時偃父尚之為元凶司空義師至  
新林門生皆逃尚之父子與婢妾共洗黃閣故暢譏之  
華林勲閣張敬兒拜開府儀同王敬則戲之呼為褚彥  
回敬兒曰我馬上所得終不能作華林閣勲也敬則甚

恨焉

南史

神滅范鎮字子真不信因果著神滅論出朝野諠譁子  
良集儒難之而不能屈太原王琰乃著論譏鎮曰嗚呼  
范子曾不知其先祖神靈所在欲杜鎮後對鎮又對曰

嗚呼王子知其先祖神靈所在而不能殺身以從之其險詣皆此類也上

領軍面常粲字長倩為右衛率領直頗擅權誕倨不為時輩所平右衛朱異嘗於酒席厲色謂粲曰卿何得色爾領軍面向人初常黯為太僕卿而兄子粲為左衛率黯以常快快謂人曰常粲已落驂騑前朝廷是能用才不識者頗以此闕之

鬼名柳津字元舉慶遠子也雖乏風華性甚強直人或

勸之聚書津曰吾常請道士上章驅鬼安用此鬼名耶  
衡定張纘字伯緒負其才氣無所與讓定襄侯祇無學  
術頗有文性與兄衡山侯恭俱為皇太子愛賞時纘從  
兄謚聿並不學問性又凡愚恭祇嘗預東宮盛集太子  
戲纘曰丈人謚聿皆何在纘從容曰纘有謚聿亦殿下  
之衡定太子色慙或云纘從兄聿及弼愚短湘東王在  
坐問纘曰丈人二從聿弼藝業何如纘曰下官從弟雖  
並無多猶賢殿下之有衡定舉坐愕然

南史

脫衣胡叟於高允館見中書侍郎趙郡李璨璨被服華靡叟貧老衣褐璨頗忽之叟謂之曰老子今若相許脫體上袴褶衣帽君欲作何計也譏其惟假盛服璨惕然失色

書魏

精騎羸卒孫寧字彥舉學淺行薄邢邵嘗謂曰卿更須讀書孫曰我精騎三千足敵君羸卒數萬寧嘗服棘刺

丸李諧詆之曰卿應自足何假外求坐者皆笑

北史

雄狐畢義雲家富于時恣情驕侈門門穢雜聲偏朝野

為郎時與左丞米游道因公事忿競游道廷辱之云雄  
狐之詩千載為汝義雲一無所答

師公徐之才父雄祖成伯並善醫術世傳其業祖孝微  
戲之呼為師公之才曰既為汝師復為汝公在三之義  
頗居其兩之才嘗以劇談調魏收收熟視之曰面似小  
冢方相之才答曰若爾便是卿之葬具

談載

稱文名徐之才聰辨強識尤好劇談李諧於廣坐因稱  
其父名曰卿嗜熊白生否之才曰平耳又曰卿此言於



理乎否諧遽出避之道遂其甥高德正德正曰舅顏色  
何不悅諧告之故德正徑造坐席連索熊白之才謂坐  
者曰箇人諱底衆莫知之才曰生不為人所知死不為  
人所諱此何足問唐邕白建方貴時人言云并州赫赫  
唐與白之才蔑之元日對邕為諸令史祝曰見卿等位  
當作唐白又以小史好嚼筆故嘗執管就元文遙口曰

借君齒其不遜如此

北齊書

嗤玩魏收叔季景有文學歷官著名並在收前然收常

所欺忽季景收初赴并頓邱李庶者故大司農諧之子  
也以華辨見稱曾謂收曰霸朝便有二魏收率爾曰以  
從叔見比便是邢翰之比卿邢翰者故尚書令陳留公  
繼伯之子愚癡有名好自入市肆高價買物商賈共所  
嗤玩收忽以季景方之不遜例多如此

北史

詭異祖孝徵珽所乘老馬自稱驢駒又與寡婦王氏姦  
通每人前相聞往復裝讓之與珽早狎嘗於衆中嘲珽  
曰卿那得如此詭異老馬十歲猶號驢駒姦耳順

子于時喧然傳之

鳴吠聒耳梁庾信從南朝初至北方文士多輕之信將  
枯樹賦以示於衆後無敢言者時溫子昇作韓陵山寺  
碑信讀而寫其本南人問信曰北方文士何如信曰唯  
有韓陵山一片石堪共語薛道衡盧思道少解把筆其  
餘驢鳴狗吠聒耳而已

朝野  
僉載

齊駱駝劉晝字孔昭制一首賦以六合為名自謂絕倫  
乃歎儒者勞而寡功曾以賦呈魏收而不拜收忿之謂

曰賦名六合已是太愚文又愚於六合君四體又甚於  
文畫不愆又以示邢子才子才曰君此賦正似疥駱駝  
伏而無斌媚畫常自謂博物奇才言好矜大每言使我  
數十卷書行於後世不易齊景之千駟也

北史

書奏成隙何妥字棲鳳性勁急有口才好是非人物蘇  
威時兼五職上親重之威先嘗隱武功妥奏云今當官  
之人不度德量力既無呂望傳說之能自負傳巖渭水  
之氣不慮憂深責重惟畏聰領不多書奏威大銜之二

年威定考文學安更相訶詆威勃然曰無何安不慮無

博士安應聲曰無蘇威亦何憂無執事於是與有隙

隋書

伐櫻桃賦蕭穎士李林甫採其名欲拔用之乃召見時

穎士寓廣陵居母喪即縗麻而詣京師徑謁林甫於政

事省林甫素不識遽見縗麻大惡之即令斥去穎士大

忿乃為伐櫻桃賦以刺林甫云擢無庸之瑣質蒙本枝

而自芘洎羣林而非據專朝廷之右地雖先寢之或薦

豈和羹之正味其狂率不遜皆此類也

舊唐書穎士開元二

十三年及第恃才傲物曼無與比常自攜一壺逐勝郊野偶憇於逆旅獨酌獨吟會有風雨暴至有紫衣老人領一小僮避雨於此潁士見之散冗頗肆陵侮逡巡風定雨霽車馬驟至老人上馬呵殿而去潁士倉忙覘之左右曰吏部王尚書也潁士常造門未之面極驚愕明日具長牋造門謝罪命引至廡下坐責之且曰所恨與子非親屬常庭訓之耳頃曰子負文學之名踞忽如此止於一第乎潁士終楊州功曹

妄貶李詳字審已有才華膽氣故蕩不羈解褐鹽亭尉  
詳在鹽亭因考為錄事參軍所擠詳謂刺史曰錄事恃  
紂曹之權當要害之地為其妄褒貶耳若使詳秉筆亦  
有其詞刺史曰公試論錄事考狀遂授筆詳即書錄事  
考曰怯斷大按好勾小稽自隱不清言他總濁階前兩  
跪闕惘方休獄裏囚徒非赦不出天下以為談笑之最

馬御史  
臺記

聰明過人韓十八愈直是太輕薄謂李二十六程曰某

與丞相崔大羣同年往還直是聰明過人李曰何處是過人者韓曰共愈往還二十餘年不曾共說著文章此豈不是敏慧過人也

喫不潔太遲韓愈初貶之制舍人席夔謂之詞曰早登科第亦有聲名席既物故友人多言曰席無令子弟豈有聲陰毒傷寒而與不潔喫耶韓曰席十八喫不潔太原人問之曰何也曰出語不是益怨其責辭云亦有聲

名耳

劉賓客  
家話



鬼錄裴勛容貌么麼而性尤率易慈恩寺連接曲江及京輦諸境每歲新得第者畢列姓名于此勛常與親識游見其父及諸家榜率多物故謂人曰此皆鬼錄也

王泉

牛不勝載唐進士曹唐遊仙詩才情縹緲岳陽字李遠每吟其詩而思其人一日曹往謁之李倒屣而迎曹儀質充偉李戲之曰昔者未見標儀將謂可乘鸞鶴此際拜見安知壯水牛亦恐不勝其載時人聞而笑之

北夢  
瑣言

中書將軍宣宗愛唱菩薩蠻詞狐楚假溫庭筠新撰密

進之戒令勿泄而遽言於人由是疎之溫亦有言云中

書內坐將軍譏相國無學也

北夢  
瑣言

俗傳謗大中中孝太尉三貶至朱崖時在兩制者皆為  
擬制往往有俗傳之制云蛇用兩頭狐搖九尾鼻不正

而身其正眼既斜而心亦斜此仇家謗也

南部  
新書

短諸葛薛能會昌間進士自負過高從事西川日每短  
諸葛功業為詩曰陣圖誰許可廟貌我揶揄又云焚却  
蜀書宜不讀武侯無可律吾身譏李白曰我生若在開

元日爭遣名為李翰林又曰李白終無取陶潛固不刊  
自題其集云詩源何代失澄清四方聯絡盡蛙聲

子弟三變成通中荊州書生號唐五經學識精博常謂  
人曰不肖子弟有三變第一變為蝗蟲謂衛莊而食也

第二變為蠹魚謂衛書而食也第三變為大蟲謂賣奴

婢而食也三食之輩何代無之

北夢  
瑣言

同年大榮張曙與杜荀鶴同年嘗醉中謔荀鶴曰杜卜  
幸而大榮荀鶴曰何榮曙曰與張五十郎同年爭不榮

荀鶴應聲答曰是公榮小子爭得榮曙笑曰何也荀鶴

曰天下祇知有杜荀鶴阿沒處知有張五十郎

撫言

誇頭角李山甫咸通中不第後流落河朔為樂彥禎從事多怨朝廷之執政嘗有詩云勸君不用誇頭夢裏贏

輸惣未真

南部新書

丹砂丸光啟中蔣嶠以丹砂授善和常中令張鵠吳人有文而不貧或刺之曰張鵠只消千馱絹蔣嶠唯用一

凡丹

撫言

賈鐵嘴漢賈緯文筆未能過人而議論剛強儕類不平之目之為賈鐵嘴受詔脩高祖實錄誣桑維翰身沒之日有白金八千錠又以所撰日歷示監修王峻皆媒孽豆貞固蘇禹珪之短歷詆朝士之先達者峻惡之謂同列曰賈給事家有子亦要門閥無玷今滿朝並遭非毀教士子何以進身乃於太祖前言之出為平盧行軍司

馬續世說

笑端禮部尚書崔貽孫年過八十求進不休囊中之資

素有貯積性好于人喜得小惠左降之後二子爭財皆甘醫藥咸不供侍書責其子曰生有明君真宰死有天

曹地府無老朽豈放爾耶為縉紳之笑端

北夢  
瑣言

藝如襪線韓昭仕王蜀至禮部尚書文思殿大學士粗有文章至於琴棋書算射法悉皆涉獵以此承恩於後主有朝士李台嘏曰韓八座事藝如拆襪線無一條長時人題之瑣言昭字德華長安人衍北巡以為文思殿學士京城留守判官李台嘏云韓公凡事如僧剃髮無有

寸長

蜀史  
椅杌

臭穢宋齊丘自署碑碣每求韓熙載寫之熙載以紙塞

鼻或問之對曰文臭而穢

南唐書

王孟盛穢孫晟字文達又名忌與馮延巳並相元宗晟

輕延巳為人嘗曰金碗王孟

闕

可乎

南唐

忌鄙延

巳謂人曰王卮象甌盛穢鷄樹鳳池

闕

遂即罷

相

江南  
野史

落韻詩唐介為臺官時言文潞公燈籠錦獻張貴妃事

上怒甚謫春州李承之送以詩有去國一身輕似葉高  
名千古重如山並遊英俊顏何厚未死奸諛骨已寒之  
句後介用潞公薦官於朝廷無所言承之以書從介索  
所送詩介無以報取詩還之曰我固不用落韻詩也以  
山寒二字韻不同故云

卽氏聞  
見錄

不可遽請劉貢父為給事中時學士鄭宏中穆表請致  
仕狀過門下省劉謂同舍曰宏中請致仕為年若干也  
答者曰鄭年七十三矣劉遽云慎不可遽其請問曰何



故也劉曰且留取伴八十四底時潞公年八十四再起

或云潞公聞之甚不憚

明道雜志

督飛揚劉貢父晚年得惡疾鬚屑墜落鼻梁斷壞苦不可言一日與東坡會飲心各引古人一聯相戲予瞻遽言曰大風起兮眉飛揚安得猛士兮守鼻梁坐中大噓貢父默然無言但感愴而已

事林廣記

父子犯罪東坡一日會客坐客舉令欲以兩卦名證一故事一人云益嘗門下三千客大有同人一人云光武

兵渡潭沱未濟既濟一人云劉寬婢羹汗朝衣家人小  
過東坡云牛僧孺父子犯罪先斬小畜後斬大畜蓋指

荆公父子也

垂王  
集

信物一角司馬溫公薨時程正叔以臆說歛之正如封  
角狀東坡嫉其怪妄因怒詆曰此其信物一角附上閻  
羅大王者耶萬簡吳克卿為高駢知揚州兼摧糴使盜用  
鹽鐵錢六十萬緡及廣陵城陷軍人識者克卿咸詣啗  
之夜克卿以他服而遁至楚州遇變為仇人所殺棄屍

衡中其妻以紙絮葦棺歛之未及就壙好事者題其上  
云信物一角附至阿鼻地獄請去斜封送上閻羅大王  
時人以為笑端

廣陵妖  
亂志

謬誤

誤造劉臻字宣摯性恍惚耽悅經事世事多所遺忘時  
有劉訥者與臻俱為儀同臻住城南訥住城東臻嘗欲  
尋訥謂從者汝知劉儀同家乎從者不知尋訥謂臻還  
家答曰知於是引之而去既扣門臻尚未悟謂至訥家

乃據鞍大呼曰劉儀同可出矣其子迎門臻驚謂曰汝亦來耶其子答曰此是大人家於是顧盼久之乃悟因此從者曰汝大無意吾欲造劉訥耳

北史

蒙霜失馬王皓字季高少立名行性懦緩嘗從文宣北伐乘赤馬旦蒙霜氣遂不復識自言失馬虞侯為求不得須臾日出馬體霜盡繫在幕前方云我馬尚在

北史

誤稱郝昂與韋陟交善因話國朝宰相誰最無德昂誤對曰韋安石也已而驚走而走逢吉溫於街中溫問何

故蒼惶如此答曰適與常尚書話國朝宰相最無德者  
本欲言吉頊誤言常安石既言又鞭馬而走抵房相之  
第琯執手慰問之復以房融為對昂有時稱忽一日犯  
三人舉朝嗟嘆唯常陟遂與之絕

國史補

熱風貞元中給事中鄭雲逵與國醫王彥伯隣居嘗有  
蕭俛求醫誤造雲逵雲逵為診之曰熱風頗甚又請藥  
方雲逵曰藥方即不如東家王供奉俛既覺失錯驚遽  
趨出是時京師有乖儀者曰熱風而已

縣官不知裴子羽為下邳令張晴為縣丞二人俱有聲氣而善言語曾論事移時吏人竊相謂曰縣官甚不和長官稱雨贊府即道晴贊府稱晴長官即道雨絡日如

此不和

封氏  
見聞

以姓相弄陽伯博任山南一縣丞其妻陸氏名家女也縣令婦姓伍他日會諸官之婦既相見縣令婦問贊府夫人何姓答曰姓陸次問主簿夫人答曰姓漆縣令婦勃然入內諸夫人不知所以欲却回縣令聞之遽入問

其婦婦曰贊府婦云姓陸主簿婦云姓漆以吾姓伍故  
相弄耳餘官婦賴吾不問必曰姓八姓九令大笑曰人  
各有姓何如此復令其婦出

封氏  
見聞

想夫憐唐司空于順以樂曲有想夫憐其名不雅將改  
之客有笑曰南朝相府曾有瑞蓮故歌為相府蓮自是

後人語訛乃不改

國史  
補

下馬陵舊說董仲舒墓門人至皆下馬謂之下馬陵語  
訛為蝦蟇陵今荆襄之人呼提為提留絳之人呼釜為

付皆訛謬所習也上

方口尖口唐之進士有姓單者就試有司司誤書為單生訴曰雖則陋宗然姓氏不欲為人所轉易乞改正之有司曰方口尖口亦何足辨單生曰若不足辨則台州

吳兒縣改作呂州矣兒縣可乎主司無以應

善諧集

馬皇載穀有一野廟中繪后稷母踐巨人跡及生稷棄之及岐嶷種樹長乞穀種於神農神農使馬皇載穀種賜之乃畫水蛭無數謂馬皇也水蛭一名馬皇

爾雅翼



一字王陳州城外有卮臺寺乃夫子絕糧之地今其中  
有一字王佛云是孔子像舊榜文宣王因風雨洗剝但  
存一王字而什子附會為一字王佛也其侍者冠服猶  
是顏淵之狀如杜甫之作十姨天下如是者並不可勝

數

鷄助  
篇

五撮鬚温州有土地杜十姨無夫五撮鬚相公無婦州  
人迎杜十姨以配五撮鬚合為一廟問杜十姨為誰曰  
杜拾遺也五撮鬚為誰曰五子胥也

席上  
腐談

南中有一泉

多有桂葉流出因名流桂泉後乃立屋其上為漢祖廟而祠之又有胥廟者其像分其鬚謂之五髭鬚並有靈

應也

國史補

江陵有村民事伍子胥神誤呼五髭鬚乃書

五丈夫皆祝呼之祭云一髭鬚二髭鬚至五髭鬚

北史瑣言

牛王有自中原來者北方有牛王廟百牛於壁而牛王

居其中問牛王為何人乃冉伯牛也伯牛乃為牛王

廣談

交甫解珮襄州漢高祖廟本為交甫解佩於漢之義今

為高祖誤也

傳載

流桂泉河南廣武山有流桂泉史思明於其上立漢高廟上

陰平路文州有橋曰陰平淳熙初有為郡守者大書立石於橋下曰鄧艾取蜀路過者笑之

老學  
菴記

惡發殿錢王名其居曰握髮殿吳音握惡相亂錢塘人遂謂其處曰此大王惡發殿也

上

彭郎小姑江南有大小山巍然獨立而世俗轉孤為此江側有一石磯謂之彭郎磯遂轉為彭郎磯云彭郎小

姑婿也小孤山廟像一婦人勅額為聖母廟西京龍門  
山夾伊水上有湍闕望之如雙闕故謂之闕塞而山口  
有廟謂之闕口廟其像甚勇手持刀按膝而坐曰豁口

大王

歸田錄

詭險

枉狀曹操與孔融既積嫌忌而郗慮復構成其罪遂令  
路粹枉狀奏融曰融昔在北海見王室不靜而招合徒  
衆欲規不執云我大聖之後而見滅於宋有天下者何

必卯金刀又融為九列不遵朝議禿巾微行唐突宮掖  
又前與白衣禰衡跌蕩放言云父之於子當有何親論  
其本意實為情欲發耳子之於母亦復奚親譬如寄物  
瓶中出則離矣既而與衡更相贊揚衡謂融曰仲尼不  
死融答曰顏回復生大逆不道宜極重誅書奏下獄棄

市

後漢書

清潔王道種會為司馬大將軍兄弟所暱聞嵇康名而  
造焉會名公子以才能貴幸乘肥衣輕賓從如雲康方

箕踞而鋟會至不為之禮

魏氏春秋

移時不交一言鍾起去

康曰何所聞而來何所見而去鍾曰聞所聞而來見所

見而去

世說

康與東平呂安親善安罹事康詣獄以明之

鍾會庭論康曰今皇道開明四海風靡邇鄙無詭隨之

入街巷無異口之議而康上不臣天子下不事王侯輕

時傲世不為物用無益於今有敗於俗昔太公誅華士

孔子戮少正卯以其負才亂羣惑衆也若不誅康無以

清潔王道於是錄康上

趣舍不同成都王穎長史盧志與機弟雲趣舍不同又  
噴門孟玖求為邯鄲令於穎穎教付雲雲時為左司馬  
曰刑餘之人不可以君民玖聞此怨雲與志讒構日至  
及機於七里澗大敗玖誣機謀反所致穎乃使牽秀斬  
機軍士莫不汨涕是日天地霧合大風折本平地尺雪  
傳別初陸抗誅步闡百口皆盡有識尤之及機雲見害三

族無遺

于寶  
晉紀

不宜酒色孝武甚親敬王國王雅雅薦王珣於帝帝欲

見之嘗夜與國寶及雅相對帝微有酒色令喚珣垂至  
已聞卒傳聲國寶自知才出珣下恐傾奪其寵因曰王  
珣當今名流陛下不宜有酒色見之自可別詔召也帝  
然其言心以為忠遂不見珣

世說

屏人論事王緒數譏殷荊州於王國寶殷其患之求術  
於王東亭曰卿但數詣王緒往輒屏人因論它事如此  
則二王之好離矣殷從之國寶見王緒問曰此與仲堪  
屏人何所道緒云故是常往來無它所論國寶謂緒於



已有隱果情好日疎讒言以息上

因輕見讒謝朓輕江柘為人柘常詣朓朓因言有一詩  
呼左右取既而便停柘問其故云定復不急柘以為輕  
已後柘及弟祀劉渢劉晏俱候朓朓謂柘曰可謂帶二  
江之雙流以嘲弄之柘轉不甚至是搆而害之臨終謂  
門賓曰寄語沈公君方為三代史亦不得見沒史

老愛泉石徐摛梁武帝問以經史百家未論釋教摛商  
較縱橫應答如響帝加歎異寵遇日隆朱异不悅謂所

親曰徐叟出入兩宮漸來見逼我須早為之所遂乘間  
白帝曰摘年老又愛泉石意在一郡帝謂摘欲之乃召  
摘曰新安大好山水任昉等並經為之卿為我臨此郡  
遂出為新安太守上

豐水草道武寵待李順政無巨細無所不參崔浩惡之  
順凡使涼州十二回太武稱其能而蒙遜數與順游宴  
頗有悖言恐順泄之以金寶納順懷中故蒙遜罪釁得  
不聞又西域沙門曇無讖有方術右涼州詔追之順受

蒙遜金聽殺之浩密言於帝帝未之太延五年議征涼州順以涼州乏水草不宜遠征崔浩固以為宜征帝從浩議及至姑臧甚豐水草帝與景穆書頗嫌順後謂浩曰卿昔所言今果驗矣克涼州後聞受蒙遜金而聽其殺曇無讖益嫌之後以差羣臣爵位頗受納品第不平涼州人徐桀發其事浩又毀之帝大怒刑順於城西順死後數年其從父弟孝伯為太武知重居中用事及浩誅帝怒甚謂孝伯曰卿從兄往雖誤國語意亦未至此

田浩遂殺卿從兄

北史

浩構李順事互見夢部

王道彭城王勰有功于國尚書令高肇性兇愎其兄女入為夫人順皇后崩帝欲以為后勰固執以為不可肇憾之引魏儻高祖珍證其逆謀永平信之召勰宴于禁中酖殺之云過醉而薨勰妃李氏司空冲之女也號哭曰高肇枉害忠良如使天道有靈汝亦行當如我及肇誅復於此室論者知有報應焉

魏書

構罪殄滅高隆之見信神武性陰毒儀同三司崔孝芬

以結婚姻不果太僕卿任集同加營構頗相乖異瀛州  
刺史元晏請託不遂並構成其罪誅害之終至家門殄  
滅論者謂有報應焉

北史

冶葛諸葛穎煬帝所親倖出入卧內帝每賜之曲宴輒  
與皇后嬪御連席共榻穎因間隙多所譖毀時人謂之

冶葛

續世說

軍無綱紀李靖破突厥禽頡利溫彥博害其功譖靖軍  
無綱紀致令虜中奇寶散於亂兵之手太宗大加責之

未幾太宗謂靖曰前有人讒公今朕意已悟公勿以為

懷舊  
唐

行伊霍事太宗自遼東還發定州在道不康劉洎與中

書令馬周入謁洎周出褚遂良傳問起居洎泣曰聖體

患臃極可憂懼遂良誣奏曰洎云國家之事不足慮正

當傳少主行伊霍故事大臣有異志者誅之自然定矣

太宗疾愈詔問其故洎以實對又引馬周以自明周對

與洎同遂良又執證不已乃賜洎自盡

舊唐

宗廟深憂許敬宗既助立武后遂謀陷長孫無忌遣人  
上封事稱監察御史李巢與無忌交通謀反帝令敬宗  
鞠之敬宗云無忌與先朝謀取天下衆人服其智作宰  
相三十年百姓畏其威懷袂一呼嘯命同惡必為宗廟  
深憂又引漢文帝薄昭事帝聽其說流黔州敬宗又遣  
大理正袁公瑜就黔州重鞠無忌反狀公瑜逼無忌令  
自縊本傳高宗欲立武昭儀為后褚遂良固執不可后立  
左還遂良為潭州都督轉桂州都督許敬宗李義府奏

言長孫無忌所構逆謀並遂良扇動

傳本

又希皇后之旨

奏遂良潛謀不軌以桂州用武之地故授遂良桂州刺

史實以為外援於是更貶為愛州刺史

韓瑗傳

長孫無忌

褚遂良與江夏王道宗有宿怨誣與房遺愛善流義州

道病死無忌以吳王恪地親望高中外所向以遺愛事

讒殺之以絕人望恪曰使社稷有靈無忌族滅遂良亦

譖殺劉洎陵高宗欲立武氏無忌遂良不從無忌貶黔

州自殺遂良貶愛州而卒

吉山影響錄  
事具新唐書



走遠兎唐宗室吳國公孝逸有破徐敬業之功時望益重武承嗣深忌之使人誣告孝逸自云走遠兎兎常在月中月既近天合有天分則天以孝逸常有功減死配

徒澹州尋卒

續世說

召飲擇人武后禁屠殺右拾遺張德生男三日私殺羊會同僚補闕杜肅懷一餽上表告之明日太后對仗謂德曰聞卿生男甚喜德拜謝太后曰何從得肉德叩頭服罪太后曰朕禁屠宰吉凶不預然卿自今召客亦須

擇之出肅表示之肅大慙舉朝欲唾其面上

名弟敘舊嚴挺之為絳郡太守玄宗欲進用之李林甫忌嫉名挺之弟損之至門叙故舊云當以子為員外郎又云聖人待賢兄極深須作一計入京既見當有大用令損之取絳郡一狀云有少風氣乞入京師就整林甫持狀奏云挺之年高近患風氣且授與一閑官玄宗數咤久之林甫奏授員外詹事便令東京養疾

偽請行盧杞忌張鎰名重道直無以陷之以方用兵西

邊杞乃偽請行上固以為不可因薦鎰以中書侍郎為

鳳翔隴右節度使鎰竟為亂兵所殺

唐

佯寢至閣殿中侍御史鄭儋與張鎰善每伺杞晝眠輒

詣鎰杞知之他日杞假寢佯熟伺儋果來方與鎰語杞

遽至鎰閤中儋趨避杞杞遽言密事鎰曰殿中鄭侍御

在此杞佯愕曰向者所言非他人所宜聞時三司使方

按詹郢獄未具而奏殺詹貶郢為驩州刺史鎰尋罷相

出鎮鳳翔

上

養使上清者竇參女奴也參流驪州沒入家資名掖庭  
後在德宗左右問曰竇參之財何止養使刺兼亦甚大  
有贓污前時納官銀器至多上清流涕曰參自御史中  
丞歷宰相首尾六年月入數十萬賞賜不知紀極廼者  
郴州所送納官銀器皆是恩賜當部錄日妾在郴州親  
見州縣希陸贄恩旨盡刮去所進銀器上刻藩鎮官銜  
姓名誣為贓物伏乞下驗之於是宣索竇參沒官銀器  
覆視其刮字處皆如清言

時貞元十二年

德宗又問養使刺事

上清曰本實無此悉是陸贄陷害使人為之德宗至是大悟因怒陸贄曰老儻奴我脫却伊綠衫便與紫看又常呼伊作陸九我任使竇參方稱意次須教我枉殺却他及至權入伊手其為軟弱甚於泥團乃下詔雪竇參時裴延齡探知陸贄恩衰得恣行媒乘間攻之贄意受譴不回後上清特敕削丹書度為女道士終嫁為金忠義妻世以陸贄門生名位多顯達者世不敢傳說故此

事絕無人知

異聞集

賜孝經李晟平朱泚之亂德宗覽汝城露布曰臣已肅  
清宮禁祇謁寢園鍾簋不移廟貌如故上感涕失聲左  
右六宮皆嗚咽露布乃于公異之辭也議者以朝廷捷  
書露布如無此者公異後為陸贄所忌誣以家行不謹  
賜孝經一卷故坎坷而終國史補人士惜其才惡贄之偏

急馬唐書

辨謗畧唐次無故貶斥久滯蠻荒孤心抑鬱乃采自古  
忠賢遭罹放逐雖至殺身而君猶不悟著書三篇謂之

辨謗畧上之德宗省之猶怒謂左右曰唐次乃方吾古  
之昏主憲宗即位召還累官至中書舍人憲宗因閱書  
禁中得次所上三篇善之謂學士沈傳師曰唐次所上  
辨謗書人君宜時觀覽朕疑編錄未盡命傳師廣為十  
卷號元和辨謗畧其序曰聖德先辨謗何由興續世說  
結不逞李逢吉字虛舟天與姦回妬賢傷善結朝臣之  
不逞者造作謗言百端中傷裴度賴李紳常處厚殺解  
逢吉結王守澄澄言於敬宗誣紳曾請立深王為太子

乃貶紳端州司馬朝士代逢吉鳴吠者張又新李續之  
張權輿劉棲楚李虞程昔範姜洽李仲言時號八關十  
六子又新等八人居要劇而胥附者又八人上

揮汗旅揖李逢吉惡李紳張又新李續之劉棲楚為之  
鷹犬同族紳貶端州司馬朝臣表賀又至中書賀宰相  
及門門者止之云張補闕在相公齊內俄而又新揮汗  
而出旅揖羣官曰端溪之事又新不敢多讓人皆辟易

憚之與續之等時號八關十六子

續世說



合勢裴度有用兵伐叛之功皇甫鎔心疾之與李逢吉  
令狐楚合勢擠度出鎮大原崔羣有公望為搢紳所重  
屢言時政之弊鎔惡之因議憲宗尊號乃奏曰昨羣臣  
議上徽號崔羣於陛下惜孝德兩字憲宗怒黜羣為湖  
南觀察使舊唐韓愈至潮州上表帝感悔欲復用之鎔素  
忌愈直即奏言愈終狂疎可且內移乃改袁州刺史新唐

惑溺

負婦人齊桓公多內寵內嬖如夫人者妻姑姊妹七人

欽定四庫全書

卷二十九

負婦人而朝諸侯管仲告諸侯吾君背有疽創不得婦

人創不衰愈

論衡

桓公宮中女市女子七百國人非之管

仲故為三歸之家以掩桓公非自傷于民也

戰國策

衣裝幡夏姬者陳大夫徵舒母也狀美好老而復壯者

三三為王后諸侯爭之莫不迷惑陳靈公與孔寧儀父

皆通焉或衣其衣或裝其幡

歌

以戲於朝

列女傳

醜夫為殉秦宣太后愛魏醜夫太后病將死出令曰為

我葬必以魏子為殉魏子患之庸芮為魏子說太后曰

以死者為有知乎太后曰無知也曰若太后之神靈明知死者之無知矣何為空以生所愛葬於無知之死人哉若死者有知先王積怒之日久矣太后救過不贍何暇乃私醜醜夫乎太后曰善乃止

戰國策

下地叩頭晉劉寶字道真子婦始入門遣婢修虔劉聊之甚苦婢固不從劉乃下地叩頭婢懼而從之明日語人曰手推故是神物一下而婢子服淫

語林

盪之墜床顏延之有愛姬非姬食不飽寢不安姬憑寵

嘗盪延之墜床致損竣殺之延之痛惜甚至常坐靈上哭曰貴人殺汝非我殺汝以冬日臨哭忽見妾排屏風以壓延之延之懼墜地因病

南史

鸚鵡為后王鸚鵡東陽公主應閣婢也初公主有奴陳天興鸚鵡養以為子而與之淫通鸚鵡天興並與元凶劬巫蠱事公主薨劬慮言語泄嫁與始興王濬府佐沈懷遠為妾後事泄上驚惋即收鸚鵡家得劬瀹手書皆咀呪巫蠱之言劬行弑逆既敗妻殷氏賜死於廷尉臨

刑謂獄丞江恪曰汝家骨肉相殘何以枉殺天下無罪

人恪曰受拜皇后非罪而何殷氏曰此權時耳當以鸚

鵒為后也懷遠坐納鸚鵒孝武徙之廣州兄懷文因此

失調為治書侍御史

南史幼懷文傳

鸚鵒娥如裏露紅鏡前眉

樣自新宮稍教得以紅兒貌不嫁南朝沈侍中

比紅兒詩

衰暮畜伎張瓊字祖逸還吳後居室豪富伎妾盛房或

有譏其衰暮畜伎瓊曰我少好音律老而方解平生嗜

欲無復一存唯未能遣此耳

南史

明月入懷元魏孝武帝之在洛也從姊不嫁者三  
一曰平原公主明月南陽王寶炬同產也二曰安德公主清  
河王懌女也三曰蒺藜亦封公主帝內宴令諸婦人詠  
詩或詠鮑照樂府曰朱門九重門九閨願逐明月入君  
懷帝既以明月入關蒺藜自縊宇文太使元氏諸王取  
明月殺之

紀本

殺婢葬代神武欲至洛陽京兆王昂弟仲景遂棄妻子  
追駕至長安封順陽王仲景既失妻子乃娶故爾朱夫

光妻也列氏本倡女有美色仲景甚重之經數年前妻叔袁紇氏自洛陽間行至也列遂徙居異宅久之有姦事露詔仲景殺之仲景寵情愈至謬殺一婢蒙其屍首重葬以代焉後謀殺袁紇奴告周文帝周文依奏詔苦仲景一百也列以自告而逐之仲景猶私不已又有告者詔重笞一百官爵盡陳仲景仍通焉後周文奏復官爵也列袁紇於是同居

北史

自得絕異琅邪公主名玉儀魏高陽王斌庶生妹也文

襄遇諸途悅而納之遂被殊寵奏魏帝封爲文襄謂崔  
季舒曰爾由來爲我求色不如我自得一絕異者崔遲  
必當造直諫我亦有以待之及遲諮事文襄不復假以  
顏色居三日遲懷刺墜之於前文襄問何用此爲遲悚  
然曰未得通公主文襄大悅把遲臂入見焉季舒語人  
曰崔遲常忿吾佞在大將軍前每言叔父合殺及其自  
作體佞乃體過於吾主儀同產姊靜儀先適黃門郎崔  
括文襄亦幸之皆封公主括父子由是超授賞賜甚厚



馬上

股為琵琶高洋亮暴貴嬪薛氏有小過遽殺之解之抱

其股為琵琶彈之復嘆曰佳人難再得

獨異志

文宣薛嬪

者本倡家女也年十四五時為清河王岳所好其父求

內宮中大被嬖寵其姊亦俱進御文宣後知先與岳通

又為其父乞司徒公帝大怒先銘殺其姊薛嬪當時有

娠過產亦從戮

北史

王釗檢婢臨賀王正德妹長樂主適陳郡謝禧正德姦

之燒主第縛一婢如玉釧於手以金寶附身聲云主被  
燒死檢取婢屍并金玉葬之仍與主通呼為柳夫人生

二子焉日月稍久風聲漸露

南史

籠頭芻秣畢又雲酷暴殘忍有孽子善昭與其侍婢姦  
通榜掠無數為其著籠頭繫之庭樹食以芻秣十餘日

乃仆之夜中又雲被賊害即善昭所佩刀也

北史

奉宸天后時張昌宗得幸又薦其兄易之傳粉施朱衣  
錦繡服俱承辟陽之寵置奉宸府以易之為令令選美

少年為左右奉宸供奉右補闕朱敬則上疏云陛下內寵已有薛懷義張易之昌宗固應足矣近聞尚舍奉御柳模自言子良賓潔白美鬚眉左監門衛長史侯祥云陽道壯盛過於懷義堪奉宸內供奉無禮無儀溢于朝聽則天勞之曰非卿直言朕不知此賜綵百段

易之舊傳

醉順妃欲閹主王曦納金吾使尚保殷之女為賢妃有殊色曦嬖之醉中妃所欲殺則殺之所欲宥則宥之

世說

出館虞集未遇時為許衡門客虞有所私午後輒出館

許每往不遇病之因書於簡云夜夜出游知虞公之不  
可諫虞回即對云時時來擾何許子之不憚煩許明日  
又至見而嘆賞遂荐於朝

耕餘博覽

許虞相去甚遠蓋誤

嗤鄙

賦詩不知襄二十七年齊慶封來聘其車美叔孫曰豹  
聞之服美不稱必以惡終美車何為叔孫與慶封食不  
敬為賦相鼠亦不知也次年來奔叔孫穆子食慶封慶  
封汜祭穆子不說使工為之誦茅鴟亦不知

左傳

不知疇麻王子建出守於城父與成公乾遇於疇中問  
曰是何也成公乾曰疇也疇也者何也所以為麻也麻  
者何也曰所以為衣也成公乾曰昔者莊王伐陳舍於  
有蕭氏謂路室之人曰巷其不善乎何溝之不浚也莊  
之猶知巷之不善溝之不浚今吾子不知疇之為麻麻  
之為衣吾子其不主社稷乎王子果不立  
說苑  
得鍾掩耳范氏之亡也百姓有得鍾者欲負而走則鍾  
大不可負以椎毀之鍾況然有音恐人聞之而奪已也

遽掩其耳惡人聞之可也惡己自聞之悖矣

呂自  
知

刻舟求劍楚人有涉江者其劍自舟中墜於水遽契其舟曰是吾劍之所從墜舟止從其所契者入水求之舟已行矣而劍不行求劍若此不亦惑乎

上

帶益三副齊湣王亡居衛謂公王丹曰我何如主也王丹對曰王賢主也臣聞古人有辭天下而無恨色者臣聞其聲於王而見其實王名稱東帝實辨天下去國居衛容貌充滿顏色發揚無重國之意王曰甚善丹知寡

人寡人自去國居衛也帶益三副矣

過自理

暴布人之目以照見之也瞑者目無由接而言見詭戎人見暴布者而問之曰何以為之芥芥也指麻而示之怒曰孰之壤壤也可以為之芥芥也

知接

園鹿欄牛楊子雲作法言蜀富人費錢千萬願載於書子雲不聽夫富無仁義之行園中之鹿欄中之牛也安

得妄載

論衛失史

不知移中孝明之世讀蘇武傳見武官名曰移中監以

問百官百官不知論

衛

謁見儀漢司徒崔烈辟上黨鮑堅為掾將謁見自憂不  
過問先到者儀適有答者曰隨典儀口唱既謁見曰可  
拜堅亦曰可拜讚者曰就位堅亦曰就位因復著履上  
坐將離席不知履所在讚者曰著脚堅亦曰履著脚也

笑林

奏載龔名後漢葛龔字元甫善文奏或有人請龔奏于  
人者龔為作之其人志自載其名并寫龔名以進時語



曰作奏雖工宜去葛龔

梁榮期  
語林

鑽火魏人夜暴疾命門人鑽火是夕陰瞑督迫頗急門人忿然曰君責人亦大無理今闇如漆何以不把火照我當得覓鑽火具然後易得耳孔文舉聞之曰責人當以其方也

笑林

墳墓不思司馬文王與劉禪宴為之樂故蜀技旁人皆為之感愴而禪喜笑自若王謂賈充曰人之無情乃可至於是乎雖使諸葛亮在不能輔之久全而况姜維邪

充曰不如是殿下何由并之他日王問禪曰頗思蜀否  
禪曰此間樂不思蜀卻正聞之求見禪曰若王後問宜  
改而答曰先人墳墓遠在隴蜀乃心西悲無日不思因  
閉其目會王復問對如前王曰何乃似卻正語邪禪驚  
視曰誠如尊命左右皆笑

三國志

自謂侯身毛嘉魏明帝毛后父也封博平鄉侯嘉本典  
虞車工卒報富貴明帝令朝臣會其家飲宴其容止舉  
動甚蚩駘語輒自謂侯身時人以為笑

三國志

胡慶字文

亮靈太后族孫也為左僕射度頑蔽每與人言自稱僕

射時人方之毛嘉

北史

索米作傳陳壽將為三國志謂丁梁州曰若覓千斛米見借當為尊公作佳傳丁不與米遂不為立傳時論以

此少論梁州敬禮子也

語林

有情癡任育長

瞻

童少時神明可愛時人謂育長影亦

好自過江便失志王丞相請先度時賢共至石頭迎之猶作疇日相待一見便覺有異坐席竟下飲便問人云

此為茶為茗覺有異色乃自申明云向問飲為熱為冷耳嘗行從棺邸下度流涕悲哀王丞相聞之曰此是有

情癡

世

熏鼠謝虎子據嘗上屋熏鼠胡兒既無由知父為此事

聞人道癡人有作此者戲笑之時道此非復一過太傳既了己之不知因其言次語胡兒曰世人以此謗中郎亦言我共作此胡兒懊熱一月日閉齋不出太傳虛託引己之過以相開悟可謂德教上

鬼兵相助王凝之羲之子也王氏世事張氏五斗米道  
凝之彌篤孫恩之攻會稽寮佐請為之備凝之不從方  
入靖室請禱出語諸將佐曰吾已請大道鬼兵相助賊  
自破矣既不設備遂為孫恩所害

書

妙畫通靈顧愷之字長康嘗以一厨畫糊題其前寄桓  
玄皆其深所珍惜者玄乃發其厨後竊取畫而緘開如  
舊以還之給云未開愷之見封題如初但失其畫直云  
妙畫通靈變化而去亦猶人之登仙了無怪色上

戲弄遙贊顧愷之矜伐過實少年因相稱譽以為戲弄  
又為吟詠自謂得先賢風制或請其作洛生詠答曰何  
至作老婢聲義熙初為散騎常侍與謝瞻連省乃於月  
下長詠瞻每遙贊之愷之彌自力忘倦瞻將眠令人代  
已愷之不覺有異遂申旦而止

晉書

星渴入井秦符生時太白犯東井有司奏東井秦之分  
也太白罰星必有暴兵起于京師生曰星入井者必將

渴耳何所怪乎

載北

熒惑狂語南燕慕容德建平四年妖賊王始聚衆於太  
山萊蕪谷自稱太平皇帝號父同為太上皇號兄休為  
征東將軍太為征西將軍假署公卿誑動百姓德遣車  
騎將軍慕容鎮討擒之將斬於馬市有人謂之曰何為  
妖妄自貽族滅父及兄弟何在答曰太上皇蒙塵在外  
征東征西為亂兵所害如朕今日復何聊賴其妻趙氏  
怒曰君止坐此口以至於死如何臨刑猶自不革始答  
曰皇后不達天命自古迄今豈有不破之家不亡之國

哉行刑者以刀鐮築其口始曰朕今為爾所苦崩即崩矣終當不易尊號德聞而笑謂左右曰熒惑之人死猶

狂語何可不殺

出十六國春秋

圖鹵簿劉韞字彥文道欣子也人才凡鄙特為明帝所寵在湘州雍州使善畫者圖其出行鹵簿羽儀常自披玩嘗以圖示征西將軍蔡興宗興宗戲之陽若不解畫者指韞形問之曰此何人而在興韞曰政是我其庸底

類如此

南史



聚憂劉韞弟述字彥思亦甚庸劣從子侯疾危篤父彥  
節母蕭對之泣述嘗侯之便命左右取酒肉令侯進之  
皆莫知其意或問焉答曰禮云有疾飲酒食肉述又嘗  
新有總慘或詣之問其母安否述曰唯有愁惛次訪其  
子對曰所謂父子聚應蓋謂應為憂也

上

不識士衡劉義綦封營道縣侯凡鄙無識始興王濬嘗  
謂曰陸士衡詩云營道無烈心其何意苦阿父如此義  
綦曰下官初不識士衡何忽見苦其庸塞皆然

才語見向彭城王義康素無術學待文義者甚薄袁淑  
嘗詣義康義康問其年答曰鄧仲華拜袞之歲義康曰  
身不識也淑又曰陸機入洛之年義康曰身不讀書君  
無為作才語見向其淺陋若此

上

忘誠誤云劉義宣之敗還江陵也帶甲尚萬餘人義宣  
既入城仍出聽事見客左右翟靈寶誠使撫慰衆賓以  
臧質違指授之宜用致失利今治兵繕甲更為後圖昔  
漢高百敗終成大業而義宣忘靈寶之言誤云項羽千

敗衆咸掩口而笑

宋書

檢覓鳳毛謝超宗鳳子也好學有文辭選補新安王子鸞國常侍王母殷淑儀卒超宗作誄奏之帝大嗟賞謂謝莊曰超宗殊有鳳毛恐靈運復出時右衛將軍劉道隆在御坐出候超宗曰聞君有異物可見乎超宗曰懸磬之室復有異物耶道隆武人無識正觸其父名曰旦侍宴至尊說君有鳳毛超宗徒跣還內道隆謂檢覓鳳毛至暗待不得乃去

南史

遷合朔阮佃夫嘗正旦應合朔尚書奏遷元會佃夫曰  
元正慶會國之大禮何不遷合朔日耶其不稽古如此  
不識太傅張敬兒欲移羊叔子墮淚碑於其處置臺綱  
紀諫云此羊太傅遺德不宜遷動敬兒曰太傅是誰我  
不識

密室學揖張敬兒始不識書及為方伯乃習學讀孝經  
論語初徵為護軍乃潛於密室中屏人學揖讓答對空  
中俯仰妄侍竊窺笑罵將拜三司謂其妻嫂曰我拜後

府開黃閣因口自為鼓聲初得鼓吹羞便奏之於新林  
姥廟為妾祈子祝神口自稱三公其鄙俚如此

猪狗子梁武丁貴嬪父道還初為歷陽太守廬陵王續  
主武帝謂之賢女復育一男答曰莫道猪狗子世人以  
為笑

廟諱不憶侯景之篡也王偉請立七廟景曰何謂七廟  
偉曰天子祭七世祖考故置七廟并請七世諱敕太常  
具祭祀之禮景曰前世吾不復憶惟阿爺名標且在朔

州伊那得來敢是衆聞咸笑之

鼓吹自娛胡僧祐梁元時拜領軍將軍厚自封殖以所  
加鼓吹恒置齋中對之自娛人曰此是羽儀公名望隆  
重不宜若此答曰我性愛之恒須見耳出遊亦以自隨  
人士笑之

自謂辭工胡僧佑性好讀書愛緝綴然文辭鄙野多被  
嘲謔而自謂實工矜伐彌甚

南史

北齊并州有士族好為

可笑詩賦輕蔑邢魏諸公衆共嘲弄虛相稱讚必擊牛

醜酒延之其妻明鑒人也泣而諫之此人嘆曰才華不

為妻子所容何況行路至死不覺

顏氏家訓

七穢何令貴陽勢傾朝野筆迹疎漏遂遭十穢之書彼人恭拜忽曰永感答人借車還白不具真本流傳合朝

耻辱是其第七穢也

庾元威論書

羊羊江南有一權貴讀誤本蜀都賦注解蹲鳴茅也而為羊字後有人餉羊肉答書云損惠蹲鳴舉朝驚駭不解事義久後尋繹方知如此

顏氏家訓

龍見源師字踐言為尚書郎攝祠部後屬孟夏以龍見  
請雩時高阿那肱為錄尚書事謂為真龍出見大驚喜  
問龍所在云作何顏色師整容云此是龍星初見依禮  
當雩祭郊壇非謂真龍別有所降阿那肱忿然作色曰  
漢兒多事強知星宿祭事不行師出竊歎曰國家大事  
在祀與戎禮既廢也其能久乎齊亡無日矣

北史賀傳北齊

何處龍見作何物顏色隋傳何乃于星宿

使鬼開府薛榮宗常自云能使鬼後主信之經古冢榮



宗謂舍人元行恭是誰家行恭戲之曰林宗冢復問林宗是誰行恭曰郭元貞父榮宗前奏曰臣向見郭林宗從冢出著大帽吉莫鞭挿馬鞭問臣我阿貞來不北齊

七十二世碑熊安生字植之在山東時歲歲遊諸從之者傾郡縣或誑之曰某村古塚是晉河南將軍熊光去七十二世舊有碑為村人埋匿安生掘地求之不得連年訟焉冀州長史鄭大謹判之曰七十二世乃是羲皇上人河南將宣喪無此號訴非理記安生率其族向塚而

號北史

髻中叵羅祖孝徵珽放縱不羈曾至交州刺史司馬世雲家飲酒遂藏銅壘二面厨人請搜諸客果於孝徵懷中探得又魏神武嘗宴僚屬於坐失金叵羅竇太后令飲者皆脫帽果在孝徵髻中見者以為深耻孝徵怡然不

穿錐庫狄干為太宰不知書署名為干字遂上畫之時人謂之穿錐又有武將王周者署名先為告而后成其

外二人至子孫始並知書

北齊

孟勞多力穀梁傳稱公子友與莒拏相搏左右呼曰孟勞孟勞者魯之寶刀名亦見廣雅近在齊時有姜仲岳謂公子左右姓孟名勞多力之人為國所寶

顏氏家訓

弱杖太山羊肅亦稱學問讀潘岳賦周文弱枝之條為杖策之杖世本容成造厯以厯為碓磨之磨上

王莽漢書王莽贊云紫色蛙聲餘分閏位謂以偽亂貞顏之推共人讀書言及王莽形狀有一俊士自許史學

名價甚高乃云王莽非直鳴目虎吻亦紫色蛙聲

寒蟬尉瑾外雖通顯內闕風訓意在引接名流而不知  
別好學吳人搖唇振足為人所哂見人好笑時論北之  
寒蟬又少威儀子德載以蒲鞭責之便自投井瑾自臨  
井上呼云兒出聞者皆笑北史

繫于蘇威立條章每歲責民間五品不遜或答者乃云  
管內無五品之家不相應領類多如此郎茂以為繁紆  
不急奏罷之隋書

不識皮弁李子雄明辨有器幹煬帝甚任之新羅嘗遣使朝貢子雄至朝堂與語因問其冠制所由其使者曰皮弁遺象安有大國君子而不識皮弁也子雄曰中國無禮求諸四夷使者曰自至以來此言之外未見無禮憲司以子雄失詞劾奏其事竟坐免

隋書

自撻呼走蘇世長初在陝州部內多犯法世長莫能禁乃責躬引咎自撻於都街五伯嫉其詭鞭之見血世長不勝痛大呼而走觀者咸以為笑議者方議其詐

舊唐

孟堅非固張由古有吏才而無學術累歷臺省嘗於衆中歎班固有才而文章不入選或謂之曰兩都賦燕山銘典引等並入文選何為言無由古曰此是班孟堅文章何闕班固事聞者掩口而笑又謂同官曰昨買得王僧孺集益僧孺也大有道理杜文範知其誤應聲曰文範亦買得佛袍集倍勝僧孺集由古竟不之覺唐新語

坊州杜若楊纂為雍州長史尹伊任坊州司戶尚藥奏求杜若敕下度支有省郎以謝朓詩云芳州採杜若乃

委坊州貢之尹君判申云坊州本無杜若應由讀謝朓  
詩誤華省名郎如此判事不畏二十八宿向下笑人耶

太宗聞之改授雍州司法

御史臺記  
及國史補

國忌展歡周考功令史袁琰國忌衆人聚會充錄事勾  
當遂判曰曹司繁開無時暫閑不因國忌之辰無以展

其歡笑合坐嗤之

朝野  
僉載

改年多感權龍褒景龍中為瀛州刺史新遇歲京中人  
附書云改年多感敬想同之乃將書皇判司以下云有

恩改年號為多感元年衆人大笑龍褒復側聽怪赦書  
來邊褒不知忌謂府史曰何名私忌對曰父母亡日請  
假獨坐房中不出褒至日于房中靜坐有青狗突入褒  
大怒曰衝破我忌日更陳牒改作明朝好作忌日談者  
笑之

戴

被圍入樞周定州刺史孫彥高被突厥圍城數十重不  
敢詣廳文符須徵發者於小牕接入鎖州宅門及賊登  
壘乃入櫃中藏令奴曰牢掌鑰匙賊來索慎勿與昔有



愚人入京選皮袋彼賊盜去其人曰賊偷我袋將終不得我物用或問其故答曰鑰匙子在我衣帶上彼將何物開之此孫彥高之流也

金戴

恨少學蘇良嗣高宗時為荊州刺史有河東寺本蕭譽為兄河東王所建良嗣見而驚曰此在江漢之間與河東有何干涉遂奏易之而當世恨其少學云

唐新語

登牆決事賀知章風流文雅而不達吏事知禮部取舍非允子弟喧訴知章乃以足登牆頭出決事人大笑之

芋毛蘿蔔開元中中書令王智注文選是先代舊業欲  
注釋之奏請左補闕王智以東宮衛佐李玄成進士陳  
居亮等注文選先是東宮衛佐李光震入院校文選兼  
復注釋解蹲鴟云今之羊子即是芋毛蘿蔔院中學士  
向外說蕭嵩聞之撫掌大笑

大唐新語  
乾闥子同

杖杜弄麀李林甫自無學術僅能秉筆有才名於時者  
尤忌之而郭慎微苑咸文士之闡茸者代為題尺林甫  
典選部時選人嚴迫判語有用杖杜二字者林甫不識

伏字謂吏部侍郎韋陟曰此云杖杜何也陟俛首不敢  
言太常少卿姜度林甫舅子度妻誕子林甫手書慶之  
曰聞有弄麀之慶容視之掩口舊唐書

伏獵侍郎林甫引蕭晁為戶部侍郎晁嘗與嚴挺之同  
行慶吊客次有禮記蕭晁讀之曰蒸嘗伏獵晁早從官  
無學術不識伏獵之意誤讀之挺之戲問晁對如初挺  
之白張九齡曰省中豈有伏獵侍郎由是出為岐州刺  
史林甫深恨之工

金銀車韓昺昌黎子也雖教有義方而性頗闇劣嘗為集賢校理史傳有說金根處皆臆斷之曰宜其誤耶必金銀車也悉改根為銀字至除拾遺果為諫議不受所謂上馬不落即著作校書何如即秘書信不虛矣

衆子尚書

故賓善  
謠集

矜門地唐有姓房人好矜門地但有姓房為官必認云

新屬知識親疾其如此乃謂之曰豐邑

公相豐邑坊在上都是非

出方相是君何親曰是某乙再伯父人大笑曰君既是方

相姪兒只堪嚇鬼

啟顏錄

不易了鄭珏同光元年莊宗敗王彥章於中都長驅趨汴梁帝聞王師將至召宰相李振敬翔等號哭謀所向皆猶豫不決珏對曰有一策可以緩外寇不知陛下能行乎梁帝曰卿意如何珏曰願得陛下傳國寶懷之以入晉軍可以緩其師以俟段凝梁帝曰事急矣此物固何惜但卿此行得事了否卿更籌之珏俛首曰了則不易了左右縮首竊笑翼日莊宗入汴州珏率百官馬前

迎謁是日賞授萊州司戶

薛史

露布書布李克用擒劉仁榮父子命掌書記王緘草露

布緘不知故事書之於布遣人曳之

續世說

爛兮石晉康福鎮天水日嘗有疾幕客謁問福擁錦衾

而坐客有退謂同列曰錦衾爛兮福聞之遽召言者怒

視曰吾雖生於塞下乃唐人也何得以為爛奚因叱出

之世說党進吾正契丹何奚之有脚患小瘡那至於爛蓋

謂奚之種賤也

談苑

銀靴元宗幼學之年馮權常給使左右上深所親幸每  
曰我富貴為爾置銀靴保太初命親王及東宮舊僚擊  
鞠極歡頒賚有等因語及前事即日賜銀三十斤以代  
銀靴遂命工鍛靴著之人皆笑焉

南唐近事

三頭兩面党進過市見縛拘欄者問汝誦何言優者說  
韓信進怒曰汝對我說韓信見韓信即當說我此三頭

兩面之人即命杖之

談苑

金眼党進命畫工寫真寫成大怒詰畫師云我前時見

盡大虫猶用金箔貼眼我豈消不得一對金眼睛

雜志

刺地宋庠留守西都同年為河南令好述利便以農家  
藝麥費耕耨改用長錐刺地下種以畝試之自旦至暮  
不能遍又值蝗災科民畜一鷄云不惟去蝗之害亦可  
自養令民悉呈所畜鷄既集紛然而鬪莫能間止百姓  
喧嘩塞路共觀兩鷄相關罷之

史

人面起草有朝士陳東通判蘇州而權州事因斷流罪  
命黥其面曰特刺配某州牢城黥畢幕中相與白曰凡



言特者罪不至是而出於朝廷一時之旨今此人應配  
矣又特者非有司所得行東大恐即改特刺字為準條  
字再黥之頗為人所笑後有薦東之才於兩府者石叅  
政聞之曰吾知其人矣得非權蘇州日於人面上起草

者乎

東軒  
筆錄

搗冰汴渠舊例十月關口則舟楫不行王介甫欲通冬  
運遂不令閉口水既淺澁舟不可行而流水頗損舟楫  
於是以船脚數千前設巨碓以搗流冰而役夫苦寒死


者甚衆京師有諺曰昔有磨法磨平漿水今見巨碓搗

冬凌上

昭執程軍尹京日有治聲唯不甚知字嘗有道民投牒  
乞執狀造橋軍夫書昭執二字其人白云合是照執今  
是昭執乃漏四點爾軍取筆於執字下加四點乃為昭  
熱庠舍諸生作傳以譏之白櫛

易卜各字知晉州焦敏寡聞謂國子監印本九經不真  
衆言此雖起於五代羣儒精較固為真本敏曰公輩全

不細看只如周易各字却總卜殺文會  
叢談



天中記卷二十九